

尚論後篇

光緒乙巳季

經元書室刊

喻氏尙論後篇序

上古之世未有儒也所謂通天地人者巫與醫而已
巫咸始爲巫號爲神巫其事守逮夏商未改顓頊命
南正重爲司天以屬神北正黎爲司地以屬民絕地
天通亦神巫之屬也洪荒以後彷彿劫初成時光音
天來下化生世界地天未隔民神不分故 少皞

帝得命官以司之屬之重不上天安能司天黎不
下地安能司地顧溺習見聞以爲宗伯司徒之官而
上天下地後人之所以寵神其祖夏蟲語水曷足怪
乎神農嘗百草黃帝作內經伊摯製湯液天子宰相

皆醫師也皆醫官也以黃帝之聰明狗齊稱歧伯爲
天師之所論難窮極天地分列陰陽儒者雅言三墳
之書言大道者唯醫經在焉豈非窮神知化通天地
人之極致乎自周公以司巫醫師分屬六官而巫醫
之任漸輕自孔子以魯國之儒統承斯文而巫醫之
道漸隱其降而爲方技不得與儒齒則自范曄始也
東漢之末巫術熄而道教立天師之劍印遂與竺墳
魯誥鼎列爲三要其冥通立感驅風雷斥神鬼不過
古者神巫之能事巫之名閤於道而其教跡則託於
道而益尊若漢以後之醫則不能自立壇墀而感寄

跡於儒儒者窮研經術深談性命俎豆於賢人之間
而醫不出方技之列若近代之劉張李朱本朝之戴
元禮滑撓寧王仲光皆真修壹行方聞經國之大儒
曾不得攝齊扳衽廁跡儒林道學之間醫之託於儒
不若巫之託於道也蓋已久矣吾晚而得見嘉言喻
先生其爲人則盧照隣之贊孫思邈所謂道洽古今
學通術數高談正一則古之蒙莊子深入不二則今
之維摩詰也著尙論篇發揮仲景之精微補正叔和
之遺闕叅以妙悟得之神解甲乙千金之書未能或
之先也吾觀其論大青龍湯一章以其雷雨滿盈飛

騰蕩滌之神用縮而爲小青龍則龍首藏於蚕蠋馴
而爲越婢一則龍身爲綵紵白虎以成其對待真
武以鎮其佚通天之手眼馭龍之心法旁見側出
孤映絕照于載上下豈非有神者告之隆墀永歎遠
壑必盈取喻於晉重耳越勾踐之反國折肱知醫論
蠱喻政思深哉古之上醫也嗟夫不通天地人不可
以言儒不通天地人不可以言醫昔人有言以至精
至微之道傳之以至下至淺之人儒以學術殺天下
醫以經方殺天下民用天扎物用疵癘鬼神不享祀
而風火刀兵之劫繼作豈細故哉吾嘗搜緝國史以

周玄真張鐵冠之流爲高道以原禮櫻寧之流爲儒
醫於禪之冒儒者解其駁而歸禪於儒之冒儒者訂
其實而歸僞排纘甫就劫火及之知天之不欲使與
史事也遂釋然志其所有事讀嘉言之書於吾心有
戚戚焉不揆愚誕率意而敘之如此世之君子得其
書者當深思而自得之無以爲親見揚子雲言貌不
能動人而笑吾言之無當也先生姓喻氏名昌南昌
之新建人嘉言其字也重光單閼之歲相月二十八

日

自序

尙論後篇諸方總目

卷一

尙論春三月溫症大意

溫症止篇

計三法并諸方

溫症中篇

計十二法并諸方

溫症下篇

計十五法并諸方

附辨兩感溫症

卷二

合論各篇

計十三篇

真中各篇

計論三篇

小兒附篇

計論三篇

治法三例

會講附篇

計六會

問答附篇 計十六答

卷三

太陽傷風諸方 計十五方除重

太陽傷寒方 計三十九方除重附

太陽兩傷方 計十方除重

卷四

太陽陽明合方 計九方除重

陽明少陽合方 計六方除重

三陰及各症方 計三十九方除重

通合三卷共得一百八
方餘五方于論內見

尚論張仲景傷寒論重編三百九十七法卷之一

西昌喻昌嘉言甫著

黎川陳守誠伯常重梓

尚論春三月溫症大意

仲景書詳於治傷寒畧於治溫以法度俱錯出於治傷寒中耳後人未解義例故春溫一症漫無成法可師而况觸冒寒邪之病少感發溫氣之病多寒病之傷人什之一溫病之傷人什之七古今缺典莫此爲大昌特會內經之旨以暢發仲景不宣之奧然僭竊無似矣厥旨維何內

經云冬傷於寒春必病溫此一大例也又云冬
不藏精春必病溫此一大例也既冬傷於寒又
冬不藏精至春月同時病發此一大例也舉此
三例以論溫症而詳其治然後與三陽三陰之
例先後同符蓋冬傷於寒邪藏肌膚即邪中三
陽之謂也冬不藏精邪入陰臟即邪中三陰之
謂也陽分之邪淺而易療陰分之邪深而難愈
所以病溫之人有發表三五次而外症不除者
攻裏三五次而內症不除者源遠流長少減復
劇以爲在表也又似在裏以爲在裏也又似在

表用溫熱則陰立亡用寒涼則陽隨絕凡傷寒之種種危候溫症皆得有之亦以正虛邪盛不能勝其任耳至於熱症尤爲十中八九緣真陰爲熱邪久耗無以制亢陽而燎原不熄也以故病溫之人邪退而陰氣猶存一綫者方可得生然多骨瘦皮乾津枯肉爍經年善調始復未病之體實緣醫者於此一症茫然不識病之所在用藥不當邪無從解畱連展轉莫必其命昌之目擊心傷者久之茲特出手眼以印正先人之法則所以永登斯人於壽域後有作者諒必不

以爲狂誕也

溫症上篇

謹將冬傷於寒春必病溫定爲一大例

冬傷於寒藏於肌膚感春月之溫氣而始發肌膚者陽明胃經之所主也陽明經中久鬱之熱一旦發出而外達於太陽有畧惡寒而卽發熱者有大熱而全不惡寒者有表未除而裏已先實者有邪久住太陽一經者有從陽明而外達於太陽者有從太陽復傳陽明不傳他經者有自三陰傳人胃腑者有從太陽循經偏傳三陰如冬月傷寒之例

者大率太陽陽明二經。是邪所蟠據之地。在太陽則寒傷營之症。十不一見。在陽明則譫語發斑。衄血。畜血。發黃。脾約等熱症。每每兼見。而凡發表不遠熱之法。適以增溫病之困阨耳。況於治太陽經之症。其法度不與冬月相同。蓋春月風傷衛之症。或有之。而寒傷營之症。則無矣。且由陽明而達太陽者多。不盡由太陽而陽明少陽也。似此則溫症之分經用法。比之傷寒。大有不同。而世方屈指云。某日某經。某日傳經已盡。究竟於受病之經。不能摸索以求良治。所謂一盲而引眾盲。相將入火坑。

也。冤哉生命。古今誠一莫控矣。

按溫熱病亦有先見表症而後傳裏者。蓋溫熱自內達外。熱鬱腠理。不得外洩。遂復還裏而成可攻之症。非如傷寒從表而始也。傷寒從表而始。故誤攻而生變者多。溫症未必從表始。故攻之亦不爲大變。然鬱熱必從外泄。爲易誤攻而引邪深入。終非法也。

按溫熱病表症間見而裏病爲多。故少有不渴者。法當以治裏爲主而解肌。兼之亦有治裏而表自解者。其間有誤攻裏而致害者。乃春夏暴寒所中。